

# Ang Zakah

Tagalog



المكتب التعاوني للدعوة والإرشاد وتوعية الجاليات بسالطانه

سحت إشرفه وزارة المسجون الإسلاميه والأوقاف والسنه والارشاد

هاتف : 4211005 - 4211006 فاكس : 4211005 بريد الإلكتروني : Sultanah2@hotmail.com

THE COOPERATIVE OFFICE FOR CALL & FOREIGNERS GUIDANCE AT SULTANAH  
Tel: 4211005 Fax: 4211005 P.O.Box: 93675 Riyadh 11963 K.S.A. E-mail: sultanah2@hotmail.com

# أحكام الزكاة

أعدّه وترجمه إلى اللغة الفلبينية  
شعبة توعية الجاليات بالزلفي  
الطبعة الثالثة: ١٤٢٤/٥ هـ.

ح) شعبة توعية الجاليات بالزلفي، ١٤١٥ هـ

فهرسة مكتبة الملك فهد الوطنية  
أحكام النكاح في الإسلام  
٢٤ ص؛ ١٢ × ١٧ سم  
ردمك ٠١ - ٨١٣ - ٩٩٦٠  
(النص باللغة الفلبينية)  
١. الزكاة

١٥/٢٧٥٧

ديوي ٢٥٢،٤

رقم الإيداع: ١٥/٢٧٥٧  
ردمك ٠٠ - ٨١٣ - ٩٩٦٠

الصف والإخراج: شعبة توعية الجاليات بالزلفي

## محتويات الكتاب

١. حكم الزكاة
٢. زكاة الثروة الحيوانية
٣. زكاة النقدين
٤. زكاة عروض التجارة
٥. زكاة الخارج من الأرض
٦. زكاة الأسهم
٧. أهل الزكاة
٨. أحكام زكاة الفطر

## Mga Nilalaman

1. Ang Hatol Kaugnay sa Zakāh.....5
2. Ang Zakāh sa Ginto, Pilak at Pera.....6
3. Ang Zakāh sa mga Kalakal.....9
4. Ang Zakāh sa Shares o Sapi sa Kompanya .....10
5. Ang Zakāh sa Produkto ng Lupa .....11
6. Ang Zakāh sa Hayop .....12
7. Paraan ng Pagkukuwenta ng Zakāh.....13
8. Ang Mga Karapat-dapat sa Zakāh .....17
9. Ilang Paalaala Hinggil sa Zakāh .....19
10. Ang Zakātul Fiṭr .....20
11. Ilang Paalaala Hinggil sa Zakātul Fiṭr .....23

## أحكام الزكاة

### Ang mga Alituntunin sa Zakāh

#### Ang Hatol Kaugnay sa Zakāh

Ang zakāh ay ang ikatlo sa mga Haligi ng Islam. Tungkulin ng isang Muslim na magbigay ng zakāh<sup>1</sup> kapag nagmay-ari ng niṣāb<sup>2</sup> nito at inabutan ito sa kanya ng isang taon. Sinabi ni Allah (2:110): **“Panatilihin ninyo ang pagdarasal at ibigay ninyo ang zakāh.”** Ang pagsasabatas sa Islam ng zakāh ay kapupulutan ng maraming aral at kapakinabangan. Ang sumusunod ay ang ilan sa mga ito:

1. Ang paglilinis sa kaluluwa at ang paglalayo nito sa karamutan at kakuriputan;
2. Ang pagsasanay sa isang Muslim upang maging mapagbigay;
3. Ang pagpapatatag sa mga bigkis ng pagmamahalan sa pagitan ng mayaman at mahirap sapagkat ang mga tao ay nilikhang may kalikasang mahal ang sinumang nagmamagandang-loob sa kanila;
4. Ang pagsuporta sa isang mahirap na Muslim at ang pagpuno ng pangangailangan niya; at

---

<sup>1</sup> Ang buwis ng pamahalaan ay hindi kapalit o katumbas ng zakāh.

<sup>2</sup> Ang niṣāb ay ang pinakamababa na bilang o halaga ng ari-arian upang ito ay maaari nang patawan ng zakāh.

5. Ang paglilinis sa mga tao sa mga kasalanan nila at mga pagkakamali sapagkat sa pamamagitan nito ay napapawi ang mga maling gawa at tumataas ang antas nila kay Allah.

### **Ang mga Kailangang Patawan ng Zakāh**

Kinakailangang ipataw ito sa ginto, pilak, pera,<sup>3</sup> kalakal at produkto ng lupa gaya ng mga butil, mga bunga, at mga mineral at metal na minimina.

### **Ang Zakāh sa Ginto, Pilak at Pera**

Pinapatawan ng zakāh ang ginto at ang pilak maging anuman ang anyo ng mga ito. Kailangang magbigay ng zakāh para sa ginto o pilak ang sinumang nagmamay-ari ng mga ito na umabot sa *niṣāb*. Ang *niṣāb* ng purong ginto ay 20 *Mithqāl* o katumbas ng 70 gramo at ang *niṣāb* naman ng purong pilak ay 200 *Dirham* o katumbas ng 460 gramo.<sup>4</sup> Ang sinumang nagmay-ari ng *niṣāb* ng ginto ay kailangang magbigay ng 2.5% ng minamay-aring ginto at ang sinumang nagmay-ari ng *niṣāb* ng pilak ay kailangan ding magbigay ng 2.5% ng minamay-

---

<sup>3</sup> Kapag nagmamay-ari ng ginto o pilak o pera na nananatiling umaabot sa *niṣāb*, kailangan pa ring magbigay ng zakāh para rito taon-taon kahit nakapagbayad na sa nakalipas na taon o mga taon.

<sup>4</sup> Kaya ang nagmamay-ari ng purong ginto o purong pilak na umabot o humigit sa *niṣāb* ay kailangang magbigay ng zakāh na 2.5% o 1/40 ng kabuuan ng tinataglay na ginto o pilak.

aring pilak. Kapag ninais na magbigay ng zakāh na pera, kailangang alamin ang halaga ng ginto o pilak sa mismong araw na inabutan ng isang taon ang ginto o ang pilak at pagkatapos ay magbigay ng zakāh para rito na katumbas sa perang ginagamit sa tinitirahang bayan.<sup>5</sup>

Halimbawa: Kung sakaling nagmay-ari ang isang Muslim ng 100 gramong purong ginto, kailangang magbigay siya ng zakāh para rito dahil nagmay-aari siya ng gintong umabot sa niṣāb. Ang zakāh nito ay 2.5 gramong ginto. Kung ninais na pera ang ibigay para sa zakāh nito, aalamin ang halaga ng 100 gramong

---

<sup>5</sup> Kung nagmamay-ari ng hindi purong ginto o gintong hindi umabot sa 24 karat, na siya namang karaniwan sa ginto sa ngayon, ay kailangang ipaghambing ang halaga ng taglay nitong ginto sa halagang 70 gramong purong ginto. Kung ang halaga ng ginto ay mababa sa halaga ng 70 gramong purong ginto, hindi papatawan ng zakāh ang ginto: kung ang halaga naman ng ginto ay umabot sa halaga ng 70 gramong purong ginto o higit pa, kailangang magbigay ng zakāh na katumbas sa 2.5% o 1/40 ng kabuuang halaga ng ginto. Ang batayan sa pagkukuwenta ng zakāh para sa halaga ng alahas na ginto ay hindi ang halaga ng pagkakabili ng alahas kundi ang gintong tinataglay nito. Karaniwang higit na mataas ang halaga ng alahas kaysa sa tunay na halaga ng gintong nilalaman dahil ang gastos sa paggawa nito ay ipinatong na sa halaga. Halimbawa: Kung nagmamay-ari ng 80 gramo na (mga) alahas na hindi purong ginto, aalamin sa alahero ang tunay na halaga ng nilalamang ginto ng mga alahas at ito ang pagbabatayan ng halaga—hindi ang halaga ng pagkakabili ng alahas. Kaya kung ang 80 gramong alahas na hindi purong ginto ay hindi umabot sa halaga ng 70 gramong purong ginto, hindi ito papatawan ng zakāh.

ginto kapag ito ay inabutan ng isang taon sa kanya at saka magbigay ng zakāh na pera na 2.5% ng halaga ng kanyang ginto.

Kinakailangan ding magbigay ng zakāh para sa pera kapag umabot ito sa niṣāb. Kaya ang sinumang nagmay-ari ng pera na [hindi bababa sa halagang] katumbas sa halaga ng 70 gramong purong ginto. Kaya ang gagawin ng isang Muslim, kapag nagtataglay ng pera na inabutan ng isang taon sa pagmamay-ari niya, ay ang magtanong sa isang awtorisadong nagtitinda ng ginto hinggil sa halaga ng 70 gramong purong ginto. Kapag nagtataglay siya ng halagang katumbas niyon o higit pa, magbigay siya ng zakāh para rito [na katumbas sa 2.5% ng halaga nito]. Ngunit kung ang taglay niyang halaga ay mababa sa halaga na sinabi ng tinanungan, hindi siya obligado na magbigay ng zakāh.

Halimbawa: Kung ang isang tao ay nagtataglay ng \$800 at inabutan ito ng isang taon, aalamin niya ang halaga ng purong ginto kung ang batayan ng perang umiiral sa bansa ay ginto, o aalamin naman niya ang halaga ng purong pilak kung ang batayan ng perang umiiral sa bansa ay pilak.<sup>6</sup> Kung napag-alaman niya na ang halaga ng 70 gramong ginto ay \$840 halimbawa,

---

<sup>6</sup> Bagamat wala nang bansa sa ngayon na gumagamit ng *gold standard* o *silver standard*, ang karamihan sa mga Bangko Sentral sa buong mundo ay gumagamit pa rin ng ginto bilang *reserba*.

hindi na niya kailangang magbigay ng zakāh dahil ang halagang tinataglay niya ay hindi umabot sa niṣāb o sa halagang katumbas sa 70 gramong ginto. Tulad din nito ang gagawing pagkuwenta kung ang batayan ng pera ng bansa ay pilak.

### **Ang Zakāh sa mga Kalakal**

Isinatungkulin ng Islam para sa isang Muslim na mangangalakal na nagmamay-ari ng yamang ginagamit niya sa pangangalakal na magbigay ng taunang zakāh bilang pasasalamat sa biyaya ni Allah at pagtupad sa tungkulin niya sa mga nangangailangang kapatid sa pananampalataya. Saklaw ng pagpapataw ng zakāh ang lahat ng naipagbibili at nabibili<sup>7</sup> sa layuning tumubo, gaya ng *real estate*, hayop, pagkain, inumin, sasakyan at iba pa.

Ang kundisyon para sa zakāh na ito ay kailangang umabot sa niṣāb ang kalakal. Ito ay malalaman sa pamamagitan ng paghahambing ng kabuuang halaga ng kalakal sa halaga ng niṣāb ng ginto o pilak. Kailangang magbigay taun-taon ng zakāh para rito na katumbas sa 2.5% ng kabuuang halaga ng mga paninda. Kaya kung nagmay-ari, halimbawa, ang isang tao ng kalakal na nagkakahalaga ng 100,000 Piso, kailangang magbigay

---

<sup>7</sup> Ang kalakal na naipagbibili at nabibili ay mga paninda at hindi serbisyo.



ng zakāh na 2,500 Piso kung umabot sa niṣāb ng ginto ang 100,000 Piso. Ang mangangalakal na nagtitinda at bumibili ay kailangang magsagawa ng pagtataya ng halaga ng mga paninda na tinataglay niya sa simula ng bawat taon at saka siya magbayad ng zakāh nito. Kung ang isang mangangalakal ay bumili ng kalakal 10 araw bago ganap na natapos ang isang taon, papatawan pa rin ng zakāh ang kalakal na ito kasama ng iba pang mga kalakal.

Nagsisimula ang taon ng pangangalakal sa unang araw na nagsimula ito. Ang pagbibigay ng zakāh ay taunan kaya kailangang magbigay ang isang Muslim ng zakāh para sa ari-arian taun-taon. Ang ikinakalakal na mga alagang hayop na umaasa sa pakain (hindi kusang nanginginain sa pastulan) ay pinapatawan ng zakāh—maabot man ng mga ito ang bilang ng niṣāb para sa alagang hayop o hindi maabot—kapag umabot sa niṣāb ng pera ang kabuuang halaga nito. Ang zakāh para rito ay pera.

### **Ang Zakāh sa *Shares* o Sapi sa Kompanya**

Sa ngayon ay may mga taong namumuhanan sa pamamagitan ng pagmamay-ari ng *shares* o mga sapi sa mga kompanyang tulad ng *real estates* at iba pa. Mayroon sa kanila na naglalagak ng pera sa mga sapi. na maaaring kumita o malugi kung magkaminsan sa

loob ng ilang taon. Ang mga sapi na ito ay pinapatawan ng zakāh dahil ang mga ito ay itinuturing na kalakal. Kaya tungkulin ng isang Muslim na nagmamay-ari ng *shares* sa isang Kompanya na alamin taun-taon ang kabuuang halaga ng *shares* niya at saka magbigay ng zakāh. Maaari ring pagsabay-sabayin ang pagbabayad ng zakāh para sa kung ilang taon kapag naipagbili na ang mga *shares* at natanggap ang halaga.

### **Ang Zakāh sa Produkto ng Lupa**

Pinapatawan ng zakāh ang mga produkto ng lupa na **natatakal at naiimbak** gaya ng *dates*, trigo, *barley*, palay, munggo, mais at mga gaya nito, ngunit hindi pinapatawan ng zakāh ang mga prutas at ang mga gulay. Pinapatawan ng zakāh kapag umabot [ang lahat ng ito maliban sa *barley*] sa niṣāb na katumbas sa 675 Kilo. Ang niṣāb ng *barley* ay 552 Kilo. **Sa ganitong uri ng zakāh, hindi na kailangang lumipas muna ang isang taon bago magbigay ng zakāh bagkus magbibigay ng zakāh tuwing anihan.** Pinapatawan ng zakāh na 10% ng kabuuang ani kapag ito ay itinanim sa lupang pinatutubigan ng ulan, mga ilog at tulad nito, o sa madaling salita: hindi na nagpapakahirap o gumagastos ang isang magsasaka sa pagpapatubig. Subalit kung magpapakahirap o gagastos pa kapag patutubigan ang lupa, ang ipinapataw na zakāh ay 5% ng kabuuang ani. Halimbawa: Kung nagtanim ng palay ang magsasaka

at umani siya ng 800 Kilo. papatawan ito ng zakāh dahil ang niṣāb ng palay ay 675 Kilo. Papatawan ito ng zakāh na 10% ng ani o 80 Kilo kung napatubigan ang lupang pinagtaniman nang walang trabaho o gastos, o 5% ng ani o 40 Kilo kung napatubigan ang lupa nang may trabaho at gastos.

### **Ang Zakāh sa Hayop<sup>8</sup>**

Ang hayop na tinutukoy rito ay kamelyo, baka, kalabaw, tupa at kambing. Pinapatawan ng zakāh ang mga hayop na ito alinsunod sa sumusunod na mga kundisyon:<sup>9</sup>

1. Ang pagkaabot sa niṣāb. Ang niṣāb sa kamelyo ay 5 kamelyo; ang niṣāb sa tupa o kambing ay 40 tupa o kambing; at ang niṣāb sa baka o kalabaw ay 30 baka o kalabaw. Ang mababa pa sa alin man sa nabanggit na niṣāb ay hindi pinapatawan ng zakāh;
2. Na aabutan ang mga ito ng isang taon na taglay pa rin ng may-ari ng mga ito;
3. Na ang alinman sa mga ito ay *sā'imah*: nanginginain nang kusa sa pastulan sa higit na maraming araw ng taon. Hindi pinapatawan ng zakāh ang mga hayop na

---

<sup>8</sup> Kailangan pa ring magbigay ng zakāh bawat taon para sa mga hayop na pinapatawan ng zakāh kahit nakapagbigay na sa nagdaang (mga) taon. Ang hayop na ibinibigay bilang zakāh ay kailangang walang kapansanan.

<sup>9</sup> Buhay na hayop at hindi pera ang ibinibigay bilang zakāh para sa hayop.

kinukumpayan o binibilhan o binibigyan ng pakain, maliban kung kusang nanginginain ang mga ito sa higit na maraming araw ng taon dahil pinapatawan ang mga ito ng zakāh ayon sa niṣāb ng mga ito;

4. Na hindi ipinantatrabaho ang mga ito o ginagamit ng may-ari ng mga ito sa pag-aararo, paghihila ng kariton at iba pang gawain.

### **Ang Zakāh sa Kamelyo<sup>10</sup>**

Pinapatawan ng zakāh ang mga kamelyo kapag umabot ang mga ito sa niṣāb na 5 kamelyo. Kaya kapag nagmay-ari ang isang Muslim ng 5 hanggang 9 kamelyo at inabutan ang mga ito ng isang taon at nanatiling pag-aari pa rin niya, ang zakāh ay 1 tupa na isang taong gulang. Kapag nagmay-ari ng 10 hanggang 14, ang zakāh ay 2 tupa; kapag nagmay-ari ng 15 hanggang 19, ang zakāh ay 3 tupa; kapag nagmay-ari ng 20 hanggang 24, ang zakāh ay 4 tupa; kapag nagmay-ari ng 25 hanggang 35, ang zakāh ay 1 babaeng kamelyo na 1 taong gulang ngunit kung wala nito ay sapat na ang 1 lalaking kamelyo na 2 taong gulang; kapag nagmay-ari ng 36 hanggang 45, ang zakāh ay 1 babaeng kamelyo

---

<sup>10</sup> Bagamat walang kamelyo sa Pilipinas, minabuti pa rin nating talakayin ang tungkol sa zakāh nito upang maging masaklaw ang aklat na ito.

na 2 taong gulang; kapag nagmay-ari ng 46 hanggang 60, ang zakāh ay 1 babaeng kamelyo na 3 taong gulang; kapag nagmay-ari ng 61 hanggang 75, ang zakāh ay 1 babaeng kamelyo na 4 taong gulang; kapag nagmay-ari ng 76 hanggang 90, ang zakāh ay 2 babaeng kamelyo na 2 taong gulang; kapag nagmay-ari ng 91 hanggang 120, ang zakāh ay 2 babaeng kamelyo na 3 taong gulang. Kapag sumobra pa sa 120 kamelyo, ang zakāh ay 1 babaeng kamelyo na 2 taong gulang sa bawat 40 kamelyo na karagdagan o 1 babaeng kamelyo na 3 taong gulang sa bawat 50 kamelyo na karagdagan. Sa halip na tupa ay maaaring kambing ang ibigay. Heto ang talahanayang naglililaw sa pagkukuwenta ng zakāh para sa kamelyo:

<b>Bilang</b>		<b>Zakāh</b>	
<b>Mula</b>	<b>Hanggan</b>	<b>Dami</b>	<b>Uri</b>
5	9	1	tupa o kambing
10	14	2	tupa o kambing
15	19	3	tupa o kambing
20	24	4	tupa o kambing
25	35	1	1 taon na babaeng kamelyo
36	45	1	2 taon na babaeng kamelyo
46	60	1	3 taon na babaeng kamelyo
61	75	1	4 taon na babaeng kamelyo
76	90	2	2 taon na babaeng kamelyo
91	120	2	3 taon na babaeng kamelyo

Kapag sumobra pa sa 120, ang zakāh ay 1 babaeng kamelyo na 2 taong gulang sa bawat 40 na karagdagan o 1 babaeng kamelyo na 3 taong gulang sa bawat 50 na karagdagan.

### **Ang Zakāh sa Baka<sup>11</sup>**

Kapag nagmay-ari ng 30 baka hanggang 39 baka, ang zakāh ay 1 guya na isang taong gulang. Kapag nagmay-ari ng 40 hanggang 59 ang zakāh ay 1 guya na dalawang taong gulang; kapag nagmay-ari ng 60 hanggang 69, ang zakāh ay 2 guya na isang taong gulang; kapag nagmay-ari ng 70 hanggang 79, ang zakāh ay 1 guya na isang taong gulang at 1 guya na dalawang taong gulang. Pagkatapos nito, sa bawat 30 baka na karagdagan ang zakāh ay 1 guya na isang taong gulang, o sa bawat 40 baka na karagdagan ang zakāh ay 1 guya na dalawang taong gulang. Ganito ang pagtutuos saanman umabot ang bilang.

<b>Bilang</b>		<b>Zakāh</b>	
<b>Mula</b>	<b>Hanggan</b>	<b>Dami</b>	<b>Uri</b>
30	39	1	1 taon na guya
40	59	1	2 taon na guya
60	69	2	1 taon na guya
70	79	2	1 taon at 2 taon na guya

<sup>11</sup> Ang patakaran sa kalabaw ay katulad din ng sa baka.

**Ang Zakāh sa Tupa**<sup>12</sup>

Kapag nagmay-ari ng 40 hanggang 120 tupa, ang zakāh ay 1 tupa. Kapag nagmay-ari ng 121 hanggang 200, ang zakāh ay 2 tupa; kapag nagmay-ari ng 201 hanggang 300, ang zakāh ay 3 tupa; kapag nagmay-ari ng 301 hanggang 400, ang zakāh ay 4 tupa; kapag nagmay-ari ng 401 hanggang 500, ang zakāh ay 5 tupa. Sa bawat 100 tupa na karagdagan ang zakāh 'ay 1 tupa maging gaanuman karami ang madadagdag.

<b>Bilang</b>		<b>Zakāh</b>	
<b>Mula</b>	<b>Hanggan</b>	<b>Dami</b>	<b>Uri</b>
40	120	1	tupa
121	200	2	tupa
201	300	3	tupa
301	400	4	tupa
401	500	5	tupa

Isang tupa ang ibibigay bilang zakāh sa bawat isang daang karagdang tupa.

---

<sup>12</sup> Ang patakaran sa kambing ay katulad din ng sa tupa. Ang tupang ibinibigay bilang zakāh ay mga 6 buwan pataas. walang kapansanan at hindi napakatanda.

## **Ang Mga Karapat-dapat sa Zakāh**

Nagsabi si Allah (9:60): “Ang mga zakāh ay para lamang sa mga maralita, sa mga dukha,<sup>13</sup> sa mga naglilingkod sa pagtitipon nito, sa mga mapalulubag-loob ang mga puso, sa pagpapalaya ng alipin, sa mga nagkakautang, sa landas ni Allah, at sa manlalakbay —isang tungkuling iniatang ni Allah. Si Allah ay Maalam, Marunong.”

Nilinaw rito ni Allah ang walong uri ng tao na ang bawat isa ay karapat-dapat na tumanggap ng zakāh. Ang zakāh sa Islam ay bumabalik sa lipunan lalong-lalo na sa mga may pangangailangan at hindi sa mga alagad ng relihiyon gaya ng nangyayari sa ibang mga relihiyon. Ang sumusunod ay ang mga karapat-dapat na tumanggap ng zakāh

1. Ang **maralita (faqīr)** ay ang hindi makatugon sa kahit kalahati man lamang sa pangangailangan niya;
2. Ang **dukha (miskīn)** naman ay ang may kakayahang tumugon sa higit sa kalahati sa pangangailangan niya ngunit hindi niya kayang tugunan nang lubusan ang pangangailangan. Pagkakalooban sila ng zakāh ayon sa pangangailangan nila sa loob ng ilang buwan o isang taon;

---

<sup>13</sup> Ayon sa Tagalog-English DICTIONARY ni Leo James English ang **maralita** ay *extremely poor* o *lubhang mahirap* at ang **dukha** naman ay *poor* o *mahirap*.



3. Ang **mga naglilingkod sa pagtitipon zakāh** ay ang mga tao na binigyan ng pamahalaang Muslim ng kapangyarihang mangalap ng zakāh mula sa mga kailangang magbigay nito. Bibigyan ang bawat isa sa kanila ng suweldong katumbas sa pinagtrabahuhan niya at angkop sa katungkulan niya, kahit pa man siya ay isang mayaman;
4. Ang **mga mapalulubag-loob ang mga puso sa Islam** ay ang mga pinunong sinusunod sa lipunan nila, na hinahangad na pumasok sa Islam o tumigil na sa pamiminsala sa mga Muslim. Kabilang din dito ang mga bagong pasok sa Islam o ang mga taong maaakit ang puso sa Islam upang lumakas ang paniniwala sa mga puso nila;
5. Ang **pagpapalaya ng alipin** ay ang pagbili sa kalayaan nito sa pamamagitan ng zakāh at pati na ng kalayaan ng mga Muslim na binihag ng kaaway;
6. Ang **mga nagkakautang** ay bibigyan ng zakāh upang ipambayad sa utang nila. Kailangangan ang tatanggap nito ay isang mahirap na Muslim, hindi mayamang may kakayahan na magbayad at hindi taong nagkautang dahil sa paggawa ng kasalanan, at dumating na ang oras upang magbayad;
7. Ang **landas ni Allah** ay tumutukoy sa mga Mujāhid na mga nagkukusang-loob at hindi tumatanggap ng suweldo. Tatanggap sila ng zakāh para sa sarili nila at para ipanggugugol sa pagbili ng mga sandata nila.

Ang pag-aaral ng Islam ay Pakikibaka (Jihād) rin; kaya kung may Muslim na walang pera ngunit nais niyang ilaan ang sarili niya sa pag-aaral ng Islam, ipinahihintulot na bigyan siya ng zakāh na sasapat sa pag-aral lamang;

8. Ang **manlalakbay** na tinutukoy rito ay ang isang taong kinapos ng panggastos habang naglalakbay at walang maipanggugugol para sa pagbalik sa bayan niya. Siya ay pagkakalooban ng panggastos na mula sa zakāh upang makabalik sa bayan niya—kahit pa man siya ay mayaman sa bayan niya.

### **Ilang Paalaala Hinggil sa Zakāh**

1. Hindi ipinahihintulot gugulin ang zakāh sa pagpatayo ng mga masjid, sa pagpapaayos ng mga daan at sa iba pang mga gawaing katulad ng mga ito.
2. Walang zakāh para sa yamang hango sa dagat gaya ng perlas, *coral*, isda, at iba pa maliban kung ang mga ito ay itinitinda.
3. Walang zakāh para sa mga paupahang gusali, mga pagawaan, at iba pang tulad nito ngunit pinapatawan ng zakāh ang mga kinita mula rito kapag inabutan ng isang taon. Halimbawa: May paupahang bahay ang isang tao at tumatanggap siya ng upa mula rito; kapag naabutan ng isang taon ang halagang ito, o ang bahagi nito, na umabot sa niṣāb, papatawan ito ng zakāh.

## Ang Zakātul Fitr

Ang pagbibigay ng zakāh na tinatawag na *zakātul fitr* (fitrah o sadaqatul fitr o) sa katapusan ng Ramadan, ang buwan ng pag-aayuno, ay isinatungkulin ni Allah. Ito ay ibinibigay bago isagawa ang *salāh* ng ‘Īdul Fitr. Sa *Hadīth* na nasasaad sa *Sahīh* al-Bukhārī at *Sahīh* Muslim, naiulat na sinabi ni ‘Abdullāh ibnu ‘Umar (RA):<sup>14</sup> “Ang pagbibigay ng zakātul fitr na katumbas sa isang *sā’* na datiles (*dates*) o isang *sā’* na trigo ay isinatungkulin ng Sugo ni Allah (SAS)<sup>15</sup> para sa mga Muslim: alipin man o malaya, lalaki man o babae, at bata man o matanda. Iniutos niyang ibigay ito bago pumunta ang mga tao sa lugar na pagsasagawaan ng *salāh* ng ‘Īdul Fitr.” Ang isang *sā’* ay isang takal na katumbas ng dalawa at kalahating kilo.

## Ang Hatol Kaugnay Rito

Ito ay tungkulin ng isang Muslim: lalaki man o babae, bata man o matanda, at alipin man o malaya. Tungkulin din niyang magbayad nito para sa mga taong

---

<sup>14</sup> (RA): *Radiyallāhu ‘Anhu* para sa lalaki, *Radiyallāhu ‘Anhā* para sa babae, *Radiyallāhu ‘Anhum* para sa marami: ang ibig sabihin nito ay: Kalugdan siya (o sila) ni Allah. Binabanggit ito kapag nabanggit ang pangalan o taguri ng kasamahan o asawa ni Propeta Muhammad (SAS).

<sup>15</sup> (SAS): *Sallallāhu ‘Alayhi wa Sallam*: Basbāsan at batiin siya ni Allah. Sinasabi ito kapag binanggit ang pangalan o ang taguri ni Propeta Muhammad (SAS) o kapag tinutukoy siya.

umaasa sa kanya gaya ng asawa o mg. kaanak niya kung hindi nila kaya na sila mismo ang magbayad. Subalit kung makakaya rin lamang nila, mainam na sila na ang magbayad nito para sa mga sarili nila dahil sila mismo ang naatasang magbigay. Obligado lamang magbigay nito ang isang Muslim kung manggagaling ito sa sobra sa pangangailangan niya para sa araw at bisperas ng 'Īdul Fitr.

### **Ang Dahilan ng Pagbibigay Nito**

Ito ay magsisilbing panlinis para sa nag-aayuno para sa nagawa niyang pagkakamali at kasalanan habang nag-aayuno siya. Ito ay pagkain para sa mga mahirap sa araw ng 'Īdul Fitr, ang araw ng pagsasaya at tuwa. Ito ay tanda rin ng pagpapakita ng pasasalamat sa mga biyaya ni Allah, na natapos niya ang pag-aayuno at nakagawa siya ng mga nakayanang mabuting gawa. Ayon sa sabi ni ibnu 'Abbās (RA): "Ginawa ng Sugo ni Allah (SAS) na isang tungkulin ang pagbibigay ng zakātul fitr bilang paglilinis para sa nag-aayuno para sa mga nagawa nitong pagkakamali at masama (habang nag-aayuno) at pagkain para sa mga mahihirap." Ito ay Hadīth na isinalaysay nina Abū Dāwūd, ad-Dāruqutnī at al-Hākim.

### **Ang Dami at Uri Nito**

Isang *ṣā'* ng trigo o *dates* o pasas o anumang uri ng butil na karaniwang kinakain ng mga tao sa isang

lugar. Bigas ang karaniwang ibinibigay bilang zakātul fiṭr sa Pilipinas: o mais kung ito ang kinakain ng mga tao sa lugar na iyon. Ang isang sā' ay katumbas ng dalawa at kalahating kilo. Hindi tanggap na ang ibigay bilang zakātul fiṭr ay damit o anumang bagay bukod pa sa mga pagkaing nabanggit. Hindi rin maaaring ang ibigay ay perang katumbas ng zakātul fiṭr dahil salungat ito sa iniutos ng Propeta (SAS).

### **Kanino Ito Maaaring Ibigay**

Ito ay ibinibigay sa mga mahihirap na naninirahan sa lugar na pinaninirahan din ng magbibigay nito. Kung hindi niya kilala ang mga karapat-dapat tumanggap nito, maaari itong ibigay sa ibang lugar na kilala niya kung sino ang karapat-dapat tumanggap nito roon. Sa mga mahirap lamang ibinibigay ang zakātul fiṭr.

### **Ang Oras ng Pagbibigay Nito**

**Kailangang** ibigay ito paglubog ng araw sa bisperas ng 'Īdul Fiṭr. Ang **pinakamainam** na oras ng pagbibigay nito ay sa umaga ng 'Īdul Fiṭr bago isagawa ang ṣalāh ng 'Īdul Fiṭr. Batay ito sa Hadīth na nabanggit na natin. **Ipinahihintulot** na ibigay ito isang araw o dalawang araw bago sumapit ang 'Īdul Fiṭr. **Ipinagbabawal** na ipagpaliban ang pagbigay nito upang ibigay pagkatapos ng ṣalāh ng 'Īdul Fiṭr. Kung ibinigay ito pagkatapos ng ṣalāh ng 'Īdul Fiṭr nang walang katanggap-tanggap na

dahilan. hindi na ito zakātul fiṭr kundi isang karaniwang ṣadaqah (kawanggawa) na lamang. Walang masama kung nahuli sa ṣalāh ng ‘Īdul Fiṭr ang pagbibigay nito kung mayroon namang katanggap-tanggap na dahilan. Ang halimbawa ng katanggap-tanggap na dahilan ay kapag huli na ng mabalitaan kung kailan ang tumpak na araw ng ‘Īdul Fiṭr o kung sakaling nakatira sa isang lugar na malayo at walang tao roon na maaaring bigyan ng zakātul fiṭr. Nagsabi ang Propeta (SAS): ***“Ang sino mang magbigay nito (zakātul fiṭr) bago isagawa ang ṣalāh [ng ‘Īdul Fiṭr], tanggap ito (bilang zakātul fiṭr); ngunit ang sinumang magbigay nito pagkatapos ng ṣalāh (ng ‘Īdul Fiṭr), ito ay magiging isang ṣadaqah na lamang katulad ng ibang mga ṣadaqah.”***

## **Ilang Paalaala Hinggil sa Zakātul Fiṭr**

1. Ipinahihintulot na ipamahagi ang zakātul fiṭr sa higit sa isang taong mahirap at ipinahihintulot din na tumanggap ang isang taong mahirap ng higit sa isang zakātul fiṭr. Ipinahihintulot din na ilagay ang mga zakātul fiṭr sa isang lalagyan at ibigay sa mga mahihirap nang hindi na sinusukat pa.
2. Hindi ipinahihintulot na di-mabuting uri (ng bigas o mais o iba pa) ang ibigay bilang zakātul fiṭr. Sinabi ni Allah (2:267): ***“O mga sumampalataya, gumugol kayo mula sa mga mabubuti na kinita ninyo at mula sa mga pinatubo Namin para sa inyo mula***

**sa lupa. Huwag ninyong layuning ang masama mula roon *upang* gugulin ninyo samantalang hindi rin ninyo tatanggapin ito kung hindi kayo magpipikit-mata rito. Pakaalamin ninyo na si Allah ay Mayaman, Kapuri-puri.”**

3. Kung magbibigay ng zakātul fitr para sa isang sanggol na nasa sinapupunan pa lamang, ang pagbibigay na ito ay pagkukusang loob sa panig ng nagbigay. Si Uthmān ibnu `Affān (RA) ay naiulat na nagbigay nito para sa isang sanggol na nasa sinapupunan pa lamang subalit hindi ito isang obligasyon.